



KENYATAAN MEDIA

104 SUKARELAWAN A – HEART UniMAP DIRAIKAN

Kangar, 6 Jun – Seramai 104 sukarelawan Hub Sumber Pendidikan dan Latihan Autisme (A-HEART) Universiti Malaysia Perlis (UniMAP) diraikan dalam satu majlis khas Majlis Makan Malam Penghargaan Sukarelawan A-HEART yang berlangsung di Hotel Putra Regency Kangar, baharu-baharu ini.

Mereka terdiri daripada pelajar Ijazah dan juga Diploma UniMAP yang terlibat dalam pelbagai program A-HEART sejak tahun 2013 lagi.

Timbalan Naib Canselor (Hal Ehwal Pelajar dan Alumni) UniMAP, Prof. Madya Dr. Mohd Fo’ad Sakdan berkata, menjadi sukarelawan A-HEART dan memberikan komitmen terhadap pembangunan komuniti anak-anak istimewa amnya dan autistik khususnya telah membuka lebaran baharu kepada program kesukarelawanan universiti melalui University Corporate Social Responsibility.

“Kesukarelawan A-HEART tidak berkait dengan mana-mana struktur program Ko-Kurikulum universiti seperti mana-mana program kesukarelawanan lain.

“Mereka menyertai A-HEART atas dasar keyakinan dan kesucian hati untuk menyumbang ke arah kesejahteraan hidup masyarakat,” katanya.

Tambahnya lagi, melalui penganjuran beberapa program A-HEART, ianya turut memberikan pengalaman baharu kepada sukarelawan A-HEART ini.

“Mereka belajar mengurus promosi program, menyusun atur perjalanan aktiviti, bekerja dalam pasukan, mengurus bajet, menarik penglibatan rakan dan ahli masyarakat dan memanfaatkan kapasiti serta segala kemahiran insaniah yang ada pada diri mereka.

“Inilah kemahiran dan pengalaman yang ingin dibekalkan oleh universiti kepada pelajarinya dalam usaha untuk melahirkan graduan seimbang,” katanya.

Antara program yang telah dianjurkan A-HEART adalah Autism Walk yang berlangsung pada 2014; Kelas Mengaji Al-Quran untuk anak-anak istimewa (KEMANIS) yang dijalankan setiap Sabtu; Projek Love OKU iaitu kunjungan sosial ke Pusat Pemulihan Dalam Komuniti (PDK) di sekitar Perlis; dan Festival A-HEART.

Apa yang menarik, bermula dengan Program Autism Walk itu, A – HEART mula mengorak langkah mendekati masyarakat melalui pelbagai program sosial dan pendidikan.

“Sukarelawan A-HEART bertapak di pelbagai agensi kebajikan seperti PDK untuk lebih memahami keunikan anak-anak istimewa ini.

“Malah mereka juga turut berjaya menambat hati Raja Muda Perlis dan Raja Puan Muda Perlis sehingga berlangsungnya Festival A-HEART 2016 pada 25 hingga 27 Mac lalu dan berjaya menjana RM 500,000 melalui pelbagai program keusahawanan sempena festival tersebut,” katanya.

Melalui impak penganjuran tersebut, UniMAP bermatlamat untuk membina Pusat Autisme A-HEART UniMAP yang bernilai 5 juta tidak lama lagi bagi memberi perkhidmatan kepada golongan autistik di kawasan utara.

Dikeluarkan Oleh :

Nurul Aida Othman

Unit Perhubungan Media UniMAP